

ԱՎԱՆԴԱԿԱՆ ԲԺՇԿՈՒԹՅԱՆ ՀԱՄԱԼՍԱՐԱՆ

ՈւՍԱՆՈՂԱԿԱՆ ԽՈՐՀՈՒՐԴ

Հաշվետվություն

2022-2023 ուստարի

Հաշվետու ժամանակահատվածում ԱԲՀ Ուսանողական խորհուրդն իրականացրել է բավականաչափ աշխատանք՝ իր կանոնադրության և աշխատանքային պլանի համաձայն: 2022-2023 ուստարվա ընթացքում գումարվել է 6 նիստ, այդ թվում՝ 2 ընդլայնված: Բոլոր նիստերն արձանագրվել են:

ՈւԽ-ն 2022-2023 ուստարվա ընթացքում ապահովել է ուսանողությանն անհրաժեշտ տեղեկատվությամբ: Ուսանողներն իրազեկվել են իրենց իրավունքների ու պարտականությունների մասին, ինչպես նաև ծանոթացել ԱԲՀ-ում գործող ուսումնական գործընթացի կազմակերպմանը, ուսումնառության արդյունքների գնահատմանը վերաբերող փաստաթղթերին և այլն:

ԱԲՀ-ում գործում են ուսանողների կրթական կարիքները վերհանող մի քանի մեխանիզմներ՝ դասախոսների, դեկանի և ուսումնական մասի վարիչի հետ կազմակերպվող քննարկումները, ուսանողների շրջանում անցկացվող հարցումները: Կուրսերի խորհրդատուների աշխատանքի միջոցով բացահայտվում են ուսումնական գործընթացի կազմակերպման, գիտելիքների գնահատման համակարգի, սեփական իրավունքների իմացության և այլ խնդիրներ:

Ուսանողներն իրենց խնդիրները, իրենց հուզող հարցերը հնարավորություն ունեն քննարկելու նաև ռեկտորի, արտաքին կապերի բաժնի մասնագետների, դեկանի, գիտական մասի վարիչի հետ:

Հաշվետու ուստարում ուսխորհրդի կազմում կատարվել է փոփոխություն՝ ՈւԽ նախագահի ընտրություն, նոր կազմի հաստատում:

ՈւԽ կազմում ընդգրկված են նախագահը, փոխնախագահը, սպորտային և մշակութային ղեկավարները, քարտուղարը և 4 անդամներ:

Ուսանողները մասնակցել են նաև ուսումնական գործընթացն առավել արդյունավետ կազմակերպելու նպատակով անցկացված առցանց հարցումներին, շրջանավարտները՝ ստացած կրթությունից բավարարվածության վերաբերյալ անցկացված հարցմանը: ՈւԽ-ն մասնակցել է այդ աշխատանքներին ուսանողների մասնակցության անհրաժեշտ մակարդակ ապահովելով, հորդորներով:

ՈւԽ նախագահը և փոխնախագահը, որպես համալսարանի ԳԽ անդամ, մասնակցել են ԳԽ նիստերին:

ՈւԽ-ն մասնակցություն է ունեցել ղեկավարության կողմից կուրսերում անցկացվող խորհրդակցություններին՝ կապված անբավարար առաջադիմության, ակադեմիական պարտքերի, անհարգելի բացակայությունների, ուսանողների հեռացման, ուսման վարձավճարի հետ, և անհրաժեշտության դեպքում, հանդես է եկել առաջարկություններով: Համալսարանի կրթական ծրագրերի որակի ապահովման կարևոր ցուցանիշ է ուսանողների շարժունության ապահովումը:

Ուսանողների մոտիվացիան ուսման նկատմամբ բարձրացնելու նպատակով, երկկողմ պայմանագրի շրջանակներում, մայիսի 29-30-ը կազմակերպվեց Լեհաստանի Բիդգոշչի (WSG) համալսարանի միջազգային բաժնի ներկայացուցիչ Լիդիա Շահբազյանի հանդիպումը ուսանողների հետ: Նա սահիկաշարով ներկայացրեց իրենց համալսարանի կողմից առաջարկվող կարճաժամկետ պրակտիկայի ծրագիրը, կրթության զարգացման, ուսանողների փոխանակման, բուժքույրության, բժշկական օգնության, պրակտիկայի ծրագրերի իրականացման հետ կապված մի շարք հարցեր: Այն մեծ հետաքրքրություն առաջացրեց ուսանողների շրջանում, քանի որ ուսանողներին տրվում է վերոհիշյալ համալսարանի կլինիկայում պրակտիկական անցնելու և համալսարանի կրթական ռեսուրսներից օգտվելու հնարավորություն, իսկ բարձր առաջադիմություն ունեցող 2 ուսանողների համար պրակտիկական կազմակերպվում է անվճար:

ՈւԽ-ն շատ ակտիվ մասնակցություն է ունեցել ապրիլի 5-ից 7-ը «Կրթություն և կարիերա EXPO 2023» ցուցահանդեսին պաստրաստվելիս և Ավանդական բժշկության համալսարանի տաղավարում համալսարանը ներկայացնելիս:

Մայիսի 19-ին միջազգային համագործակցության շրջանակներում Ավանդական բժշկության համալսարանը հյուրընկալեց ԱՄԷ-ի Շարժա քաղաքի «Success Point college»-ի Մարքեթինգի և PR-ի ղեկավարին, դասախոսներին, իրենց ուսումը ԱԲՀ-ում շարունակել ցանկացող ուսանողներին և նրանց ծնողներին: Այցելությունն ուներ ճանաչողական բնույթ:

Այցի ընթացքում հյուրերը շրջայց կատարելով համալսարանում՝ ծանոթացան համալսարանի պայմաններին, այդ թվում նաև կրթական, տեխնոլոգիական և լաբորատոր ռեսուրսներին: Այցի ողջ ընթացքի կազմակերպչական, իրականացվող աշխատանքներին իր ակտիվ մասնակցությունն ունեցան ՈւԽ-ի անդամները:

Ուսխորհրդի անդամ Էրիկ Կարապետյանը, ուսանողների հավաքագրման նպատակով, մասնագիտական կողմնորոշման շրջանակներում, համալսարանի ուսումնաօժանդակ կազմի ներկայացուցիչներ Գ.Կիրակոսյանի և Գ.Մանաշյանի հետ հանդիպում ունեցավ Պրովիզոր- նկարիչ Լ.Սարգսյանի անվան բժշկական քոլեջի շրջանավարտների հետ, նրանց ներկայացվեց ԱԲՀ-ն, բժշկական ուսումնական գործունեության առանձնահատկությունները ու ընդունելության հետ կապված շատ հարցեր: Մասնավորապես նշվեց, որ քոլեջի բարձր առաջադիմություն ունեցող շրջանավարտներին հնարավորություն է ընձեռվում իրենց ուսումը շարունակել ԱԲՀ- ի երկրորդ կուրսում:

ՈՒԽ նախագահը, առաջնորդվելով «Առողջ մարմնում՝ առողջ հոգի» կարգախոսով, հաճախակի է նախաձեռնել մշակութային և սպորտային միջոցառումներ:

ԱԲՀ ուսանողական խորհրդի նախաձեռնությամբ և Երևանի Ավանի շախմատի մարզադպրոցի աջակցությամբ ս/թ նոյեմբերի 3-ին Ավանդական բժշկության համալսարանում անցկացվել է ներբուհական շախմատի մրցաշար, որին մասնակցել են համալսարանի հայ և օտարազգի թվով 27 ուսանողներ:

Մրցաշարի հետաքրքիր և լարված պայքարում Համալսարանի լավագույն շախմատիստներ են ճանաչվել՝

- ✓1-ին տեղ՝ Էրիկ Կարապետյանը /Ստոմատոլոգիայի ֆակուլտետ, 2-րդ կուրս/,
- ✓2-րդ տեղ՝ Դակշ Շարման /Բուժական ֆակուլտետ, 4-րդ կուրս/,
- ✓3-րդ տեղ՝ Էրֆան Աղային /Ստոմատոլոգիական ֆակուլտետ, 3-րդ կուրս/:

Շախմատի մրցաշարում 3 լավագույն տեղերը զբաղեցրած ուսանողներին մեդալներ, պատվոգրեր և նվերներ է հանձնել Ավանի շախմատի մանկապատանեկան դպրոցի տնօրեն, Երևանի շախմատի ֆեդերացիայի նախագահության անդամ, շախմատի ՖԻԴԵ-ի սպորտի վարպետ Դավիթ Հունանյանը:

Համալսարանը ֆինանսական միջոցներ է տրամադրել ՈՒԽ-ին մեդալներ, պատվոգրեր և նվերներ ձեռքբերելու համար:

Մրցաշարն անցկացվել է միջազգային չափորոշիչներին համապատասխան. մրցակիցներն ընտրվել են համակարգչային հատուկ ծրագրով (www.chess-results.com), որին աշխարհի տարբեր անկյուններից կարող էին հետևել ուսանողների ծնողներն ու հարազատները:

18.03.2023թ.-ին Հայ-ռուսական համալսարանում տեղի ունեցավ Ավանդական բժշկության համալսարանի ֆուտբոլի ներբուհական առաջնությունը: Առաջնությանը մասնակցեցին «Բուժական» և «Ստոմատոլոգիական» ֆակուլտետների տարբեր կուրսերի օտարերկյա ուսանողները՝ Հնդկաստանից, Հորդանանից, Գանայից, Իրաքից և Մեծ Բրիտանիայից: Խաղին ներկա էին Ավանդական բժշկության համալսարանի «Սպորտային բժշկություն» առարկայի դասախոս Լիլիթ Սուքիասյանը՝ որպես բժշկուհի, «Արտաքին կապեր» բաժնի առաջատար մասնագետ Լիանա Վարդանյանը և որպես երկրպագուներ՝ համալսարանի ուսանողները: Առաջնությունը կազմակերպել էր ԱԲՀ Ուսանողական խորհուրդը:

Խաղի ավարտից հետո լավագույն խաղացողներն ընտրվեցին և կազմվեց համալսարանական ֆուտբոլային թիմ՝ հետագա միջբուհական խաղերին մասնակցելու համար:

Պլանավորած ֆուտբոլի միջբուհական մրցույթը տեղափոխվեց հաջորդ ուսումնական տարի:

ՈւԽ-ն կազմակերպել է նաև արտալսարանային միջոցառումներ դասախոսների հետ համատեղ: Ուսանողներն այցելել են Էրեբունի թանգարան, ցեղասպանության զոհերի հիշատակի օրը Ծիծեռնակաբերդի պուրակում ծաղիկներ են խոնարհել հուշաքարին:

ՈւԻՄ-ն ակտիվ մասնակցություն ունեցավ 2021-22 ուստարվա «Բուժական» ֆակուլտետի շրջանավարտների դիպլոմների հանձնման հանդիսավոր արարողության կազմակերպման աշխատանքներին:

ՈւԻՄ-ն հոկտեմբեր ամսին համախմբեց ուսանողությանը՝ կազմակերպելով մերձեցման երեկո՝ առաջին կուրս ընդունված, այլ բուհերից բարձր կուրսեր տեխափոխված ուսանողների և համալսարանի ուսանողների մասնակցությամբ:

Եթե կարող ենք բարի գործ անել, օգնել մարդկանց, կյանքեր փրկել, ապա ինչու՞ դա չանենք: Հենց այս բարձր գիտակցմամբ ու մարդասիրական մղումով էլ ՈւԻՄ-ի ջանքերով մեր համալսարանի ուսանողները «Սուրբ Գրիգոր Լուսավորիչ» ԲԿ-ում որպես դոնոր արյուն հանձնեցին:

Մայիսի 28-ին Արտաքին կապերի բաժնի առաջատար մասնագետ Լ.Վարդանյանի աջակցությամբ կազմակերպվեց էքսկուրսիա ՀՀ Տավուշի մարզ, քաղաք Դիլիջան «Սիրելի Հայաստան աշխարհը իր հրաշալիքներով» թեմայով:

Ուսանողների խնդրանքով ԱԲՀ ղեկավարության կողմից ուսանողներին տրամադրվել են ազատ օրեր՝ ազգային հիմնական տոները (Նովրուզ, Ռամադան) նշելու կապակցությամբ:

ՈւԻՄ-ն որպես տեղեկատվության տարածման հարթակ օգտագործում է ֆեյսբուք սոցիալական ցանցը:

Հավելենք, որ ուսանողության հիմնախնդիրներին մեծ ուշադրություն դարձնելը և այդ խնդիրներին լիարժեք լուծում տալը մշտապես եղել է համալսարանի ղեկավարության և ուսանողական խորհրդի անմիջական ուշադրության կենտրոնում:

Այսպիսով, իրականացվել է 2022-23 ուստարվա աշխատանքային պլանով նախատեսվածը և այլ ընթացիկ աշխատանքներ:

Առաջարկում եմ՝

1. 2023-24 ուստարում վերանայել ՈւԻՄ աշխատանքային պլանը:
2. Վերանայել և ընդլայնել ՈւԻՄ կազմը:

ՈւԻՄ նախագահ՝

Է.Աղայի

Քարտուղար՝

Ա.Անտոնյան